



Kakvi su tek ostali ako je Mujić korumpiran

Direktor Agrokomerca se sumnjiči da je u svojstvu odgovorne osobe tražio veći novčani iznos na ime određenog zakupa kako bi sebi pribavio protivpravnu korist

Direktor Agrokomerca Ermin Mujić, kojeg su policijski službenici **SIPA** u ponedjeljak uhapsili u operativnoj akciji kodnog naziva Kapija, predat je jučer Kantonalnom tužilaštvu Sarajevo na dalje postupanje. On će u Tužilaštvu ostati najviše 24 sata, a nakon što ga postupajući tužilac u zakonskom roku ispita, bit će odlučeno o daljnim mjerama. Naime, danas će biti poznato da li će postupajući tužilac zatražiti mjeru pritvora za osumnjičenog.

Privremene mjere

On se sumnjiči da je u svojstvu odgovorne osobe tražio veći novčani iznos na ime određenog zakupa kako bi sebi pribavio protivpravnu imovinsku korist, a na štetu privrednog društva u kojem obnaša dužnost odgovorne osobe.

Podsjetimo, u okviru akcije Kapija obavljen je pretres objekata na više lokacija u Unsko-sanskom kantonu, s ciljem pronalazjenja i privremenog oduzimanja predmeta koji mogu poslužiti kao dokaz u daljem postupku.

Ermin Mujić je direktor Agrokomerca od 2015. Kako je ovo dioničarsko društvo pod ingerencijom Vlade Federacije BiH, Vlada je bila ta koja je

Nadzornom odbora dala saglasnost za njegovo imenovanje.

Naš neimenovani izvor iz Vlade tvrdi da su iznenađeni ovim hapšenjem, ali i da su sve radili po propisima.

Posljednji put, u oktobru ove godine federalna Vlada je izmijenila Odluku o finansijskoj konsolidaciji privrednog društva Agrokomerc d.d. Velika Kladuša. Istovremeno, Odlukom Općinskog suda u Bihaću imenovan je Šefik Smlatić kao privremeni stečajni upravitelj u pravnom licu d.d. Agrokomerc.

Smlatić je isti dan kada je Mujić uhapšen predao Sudu završni izvje-

Pretpostavljam da će Tužilaštvo tražiti pritvor, jer su i najavili da će ga tražiti, ali to ćemo znati u srijedu, kazao nam je jučer advokat osumnjičenog Salih Dedić iz Bihaća

štaj na osnovu kojeg će Sud donijeti konačnu odluku o stečajnom postupku. A nakon vijesti o hapšenju, Smlatić je ponovo Sudu podnio hitan zahtjev da donese rješenje o uvođenju privremenih mjera.

- Mislim da bi to bilo opravdano, da sada Agrokomerc ne uđe u jedno stanje bezakonja, kazao nam je Šefik Smlatić.

I u Udruženju dioničara Agrokomerca nisu zadovoljni kako se upravljalo Agrokomercem.

- Ako je najodgovorniji čovjek Agrokomerca umiješan u korupciju i mito, šta se onda dešavalo prije toga? Sve kreće od Vlade Federacije, od odabira strateškog partnera do transparentnosti u radu. Svi ti pregovori i ugovori oko Agrokomerca bi trebali biti podložni provjeri, jer mi vjerujemo da je bilo tu više kriminalnih radnji, rekao nam je Mirvet Beganović, član Udruženja dioničara Agrokomerca i poslanik u Skupštini USK-a.

On ističe da je Nadzorni odbor Agrokomerca u postratnom periodu naplatio 400.000 KM za svoj rad, te da i oni moraju biti odgovorni za stanje u produžcu.

Označene novčanice

Tužilaštvo Kantona Sarajevo sumnjiči direktora Agrokomerca Ermina Mujića da je na ime određenog zakupa pribavio sebi protivpravnu korist. O kojem konkretno je zakupu riječ, nije navedeno, a i u Krajini se o tome malo šta zna. S obzirom na to da je nadležno sarajevsko tužilaštvo, pretpostavlja da je prijava protiv Mujića tu i sačinjena. Još nepotvrđeni detalji akcije upućuju na to da je osumnjičeni lišen slobode zajedno sa 25.000 KM označenih novčanica. Nezvanično, prvobitno je predaja novca trebala biti u Sarajevu, ali se u posljednji čas desila u USK-u.

Što se tiče odbrane, ona je jučer uputila prigovor na nadležnost Tužilaštva i Suda u Sarajevu.

**EDIN BARIMAC I
FAHRUDIN BENDER**



Hale Agrokomerca u Velikoj Kladuši



Privođenje Ermina Mujića u Tužilaštvo KS-a / SENAD GUBELIĆ.